



**Les Fleurs Des Vies Des Saints Et Des Festes De Toute
L'Annee, Svivant L'Vsage Dv Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromee, & de Sainte Françoise ; Avec le Mertyrologe Romain, pour
tous les iours de l'Annee ...

Ribadeneyra, Pedro de

Paris, 1631

iv La vie des saints Vidal & Agricole mart.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

plusieurs fois enduré le cheual, les lames de fer toutes rouges de feu, & les poiles à frire, sur oint de miel par tout le corps, & par le marns liees exposé à l'ardeur du soleil, aux mouches, moustherons, guêpes & bourdons. Vn autre ayant esté délicatement lié parmy beaucoup de belles & bonnes fleurs, voyant vne femme impudique qu'on luy auoit expressément enuoyee, comme elle commença à le carresser, il coupa sa langue avec ses dents, & la luy cracha au visage. En Angleterre trespassa sainte Veneside vierge & martyre. En l'Abbaye de Cleruaux mourut S. Malachie Euesque de Connerche en Hibernie ou Irlande, qui fut homme de grande vertu. A Liege S. Hubert Euesque dudit lieu.

LAVIE DES SAINCTS VIDAL,
& Agricole, Martyrs.

LE bien-heureux saint Ambroise exhortant les Vierges parle des Martyrs S. Vidal & S. Agricole en ceste maniere. La basse & abiecte condition de l'homme n'empesche pas qu'il ne soit en bonne reputation, ny la grandeur de sa race ne le rend digne de louange, si ce n'est par la Foy; car le libre & l'esclau, sont autant deuant Dieu l'un comme l'autre, & chacun recuera esgalement de luy la recompense du bien ou du mal qu'il aura fait. La liberté ne nous donne, ny la seruitude ne nous oste rien, nostre Seigneur les pese toutes deux à vne mesme balance, & n'y a point de difference des merites de l'esclau qui sert bien à ceux du libre, qui ieuir de sa liberté: parce que la plus grande dignité de toutes, c'est de seruir à Iesus-Christ. Voila pourquoy saint Paul se glorifie d'estre esclau de Iesus-Christ, d'autant que ceste seruitude est honorable, de laquelle l'Apostre se vante avec raison, puis que nostre souveraine gloire, c'est que Dieu a fait de cas de nous, qu'il nous rachetez du sang de son Fils vniue. Cela venoit à propos de ce qu'Agricole estoit Cheualier fort qualifié, & Vidal son esclau, tous deux Chrestiens, qui pour ceste occasion furent pris à Boulogne la Grace en Italie, & martyrisés sous Diocletian & Maximian, ces grands persecuteurs de l'Eglise qui ne peurent iamais estre assouis du sang des Chrestiens. Agricole estoit vn Gentil-homme de marque, bien apris, & qui auoit beaucoup d'amis: le President qui ne vouloit que l'intimider, commença par son esclau Vidal, lequel il fit fouetter, & tourmenter cruellement, afin que le maistre voyant ce qu'enduroit son esclau, se laissa persuader d'adorer les faux dieux. Les bourreaux traicterent si rudement Vidal, qu'on n'eust seu ietter les yeux sur aucun endroit de son corps qui ne fust couuert de playes, par lesquelles il auoit perdu tout son sang. Le glorieux Martyr se tournant vers le ciel pria humblement nostre Seigneur de receuoir son esprit, afin qu'il acceptast la couronne que son saint Ange luy auoit apportee, nostre Seigneur Iesus-Christ l'exauça, & receut son ame, si tost qu'il out acheué son oraison. Agricole estoit present à ce spectacle, duquel le Iuge pensoit bien l'espoué-

ter & destourner de son intention, le faisant sage par l'exemple de son seruiteur: mais avec vne cruelle pieté, comme dit S. Ambroise, puis que c'estoit pour le priuer de la gloire du martyre.

Les tourmens de Vidal n'estoient point Agricole, au contraire cela l'anima & encouragea dauantage de faire compagnie, & suiure celui qui le deuançoit en l'amour de Dieu, se montrant aussi valeureux en la foy de nostre Seigneur Iesus-Christ, qu'auoit esté son esclau. Le Iuge voyant ceste cōstance, conuertit la douceur d'oc il auoit vsé enuers luy en furie: il fit attacher en croix les membres du Saint avec de gros cloux de fer, & l'ayant esleué en l'air, luy fit représenter le Martyre de son Seigneur. Agricole montrant par ce supplice qu'il ne se foucioit gueres des choses de la terre, & qu'il aspirait au ciel, où il auoit mis son cœur: au mesme iour que le bien-heureux Vidal parmy les fouets & tourmens redit son esprit à Dieu, Agricole donna le sien à la croix, l'esclau & le maistre estans faits esgaulx en la couronne du martyre.

Leurs corps saints furent enterrez en vn cimetiere des Iuifs: Aussi saint Ambroise dit que ce furent des rozes entre les espines, & la clarté au milieu des tenebres, iusqu'à ce que Dieu les reuela. Lors qu'ils furent decouverts, l'Euesque de Boulogne d'Italie, cōuia le saint Prelat d'assister à leur translation, pour honorer Dieu en la iouissance de ce thesor à la gloire de ses Saints. Le mesme saint Ambroise fit part aux Vierges de leurs Reliques, comme il dit: Le vous ay apporté vn riche present que j'ay amassé de mes propres mains, à scaupir les trophees de la croix, la grace de laquelle vous cognoissez par les ceures, que les diables sont cōtraints de confesser. Que d'autres, si bon leur semble, accumulent de l'or & de l'argent, & arrachent ces metaux des plus creuses veines de la terre, qu'ils cherchent des ioyaux & pierres precieuses qui s'vsent & consomment, & bien souuent font tort à ceux qui les possèdent. Nous autres auons ramassé les cloux du martyre en grande quantité, parce qu'ils attacherent chaque membre avec plusieurs cloux. Nous auons recueilly du sang qu'il respandit triomphant de la mort, & le bois de la croix en laquelle il fut attaché.

S. Ambroise mit ces precieuses Reliques en vne Eglise de Florence, qu'vne grande & sainte Dame nommee Iulienne, auoit fait bastir: saint Gregoire de Tours raconte quelques miracles que fit nostre Seigneur par l'intercession de ces saints Martyrs, & dit qu'vne partie de leurs Reliques furent apportees en France, & que Narmace Euesque d'Auuergne les mit en vne Eglise qu'il auoit fait bastir.

Leur martyre fut le 4. de Novembre, auquel la sainte Eglise celebre leur feste l'an de nostre Seigneur 360. sous l'Empire de Diocletian & Maximian. Il est fait mention d'eux és Martyrologes Romain, & d'Vuard, en S. Paulin Euesque de Nole, & Gregoire de Tours, & és autres modernes qui ont escrit les Vies des Saints.

4.
Not.